

SAMBUTAN HARI ANGGOTA BOMBA SEDUNIA 2018 PERINGKAT KEBANGSAAN



SEREMBAN- 14 JULAI 2018

Majlis Sambutan Hari Anggota Bomba Sedunia 2018 Peringkat Kebangsaan yang bertemakan 'Bomba Tonggak Penyelamatan Negara' telah diadakan di Padang Majlis Perbandaran Seremban (MPS) pada 14 Julai 2018.

Majlis telah dirasmikan oleh Yang di-Pertuan Besar Negeri Sembilan, Tuanku Muhriz Ibni Almarhum Tuanku Munawir. Turut berkenan mencemar duli Tengku Ampuan Besar Negeri Sembilan, Tuanku Aishah Rohani Tengku Besar Mahmud.

Hadir sama dalam majlis tersebut, Menteri Besar Negeri Sembilan Darul Khusus, YAB Tuan Haji Aminuddin Bin Harun; Menteri Perumahan dan Kerajaan Tempatan, YB Puan Hajah Zuraida Binti Kamaruddin; Ketua Setiausaha KPKT, Dato' Sri Haji Mohammad bin Mentek; Ketua Pengarah Jabatan Bomba dan Penyelamat Malaysia (JBPM), Mohammad Hamdan Wahid dan Pengarah JBPM Negeri Sembilan, Norazam Khamis.

Acara pada pagi tersebut dimulakan dengan pemeriksaan kawalan kehormat yang disertai 99 anggota bomba lain-lain pangkat oleh Duli Yang Maha Mulia Yang DiPertuan Besar Negeri Sembilan Darul Khusus, Tuanku Muhriz Ibni Almarhum Tuanku Munawir sebelum acara diteruskan dengan deklamasi sajak oleh Pegawai Bomba, Mohd Fauzi Hazriq Bin Jamikah. Majlis kemudiannya diteruskan dengan perarakan anggota kontinjen perbarisan, pertunjukan persembahan kebombaannya oleh pasukan 'Special Tactical Operation And Rescue Of Malaysia' (STORM) serta aksi penerjunan pasukan Smoke Jumpers JBPM.

Secara keseluruhan sebanyak 28 kontinjen dan 95 Unit jentera membabitkan penglibatan lebih 2,200 orang peserta menjayakan perarakan kali ini. Perarakan kali ini melibatkan pelbagai jentera Awam dan Swasta antaranya Pasukan HAZMAT dan CBRne, Pasukan Penyelamatan Bangunan Tinggi, Bahagian Udara Bomba, Pasukan Penyelamatan Di Air (PPDA), Unit Pengesan (K9), Pasukan Penyelamatan Kemalangan Jalan Raya (RTA), Emergency Medical Rescue Services (EMRS), Kelab 3K, Pasukan Bomba Tentera, Bomba Pelabuhan dan Bomba Lapangan Terbang.

Majlis turut dimeriahkan dengan perarakan jentera bomba seperti kereta bomba Dennis, dua unit Amphibious All Train Vehicle (AATV), Rapis Resques Vehicle (RRV), 24 unit Rapid Intervention Motorcycle (RIM), dua unit Aerial Ladder Platform Turn Table (ALPT) selain lintas hormat pesawat udara bomba jenis MI17 yang membawa bendera bomba dan Jalur Gemilang semasa acara berlangsung.

Hari Bomba Sedunia disambut seluruh dunia setiap 4 Mei namun tahun ini sambutan peringkat kebangsaan diadakan pada Julai untuk memberi laluan kepada PRU14 pada Mei lalu.































